

Cártá naçahyí Pedro nu cuítí

Cáhan Ndióxi Pedro xihín na cúu cuéntá Jesús

1 Yehe cúu Pedro ta cúu u in apóstol cuéntá Jesucristo. Ta chindahá i Ndióxi coo ndó, na naçaxi mé á jáchi cúu ndó na tóho ñuu jan sahá ña nataxí ñayivi ndohó ñuu ndó. Ta viti nandicuítá nuu ndó ndúu ndó estado Ponto xihín estado Galacia xihín estado Capadocia xihín estado Asia xihín estado Bitinia. ²Cúu ndó na naçaxi Ndióxi, tátá yo jáchi janda saha nasacu ini mé á caja já xihín ndo. Ta xihín ínima yii mé á nandaja ndohó ña ná nduu ndó cuéntá mé á já ná caja ndó ña sáhndá a nu ndó caja ndó. Ta naçaxi a ndohó já ná ndivií ndo xihín nii Jesucristo. Ná caja cuahá ndivaha Ndióxi ñamaní xihín ndo ta ná caja mé á ña ná coo vaha ndivaha ini ndó.

Jáçacu Ndióxi ñayivi

³Ná caja cáhnu yó Ndióxi, mé á cúu tátá Jesucristo, xitoho í jáchi táhnda ndivaha ini mé á saha yo ta naçaja ña tácu yó cuéntá mé á viti. Já naçaja jáchi nanditacu tucu Jesucristo ta mé a ndaa cándaa vaha iní ña jáxinu coo Ndióxi tuhun a nasahan nu yo. ⁴Ta nasacu ini a quiahva cuahá ndivaha ña vaha íin indiví cán nu ndo. Mé ña vaha íin cán a cuú ndihi sahá ta ni co íchi a ta a cáyatá toho ña. Ta nasacu vaha Ndióxi mé ña vaha íin indiví cán anda tandaa quiví saa ndó cán. ⁵Cándeé ini ndó Ndióxi sahá ña cán quéa xihín ndée mé á chindeé a ndohó nuú ña ihvi vaxi nu ndo anda xinu coo quiví nu ndíhí. Janda jáví cuni ndó ndá quiahva jáçacu a ndohó.

⁶Ña cán quéa ndítahan nu ndó cajii ndivaha ini ndó viti vatí vaxi quiví ndoho ini ndó sahá tondóhó quixi nu ndo. ⁷Tá ná candeeé cáhnu ini ndó Ndióxi cúu á tátuhun jiuhun cuáán. Ta tá quiahva cája in dataa tá jáyaha da jiuhun cuáán nu ñuhú cáyi ña xító ndojó da ña quiahva já cája ri Ndióxi coto ndojó a ndohó ña ná nahá ña mé a ndaa cándeé cáhnu ini ndó mé á. Ta ndíyahvi chága ña cándeé ini ndó mé á a juú ga jiuhun cuáán, ña ndihi saha. Na cán quéa tá ná quixi tucu Jesucristo já cahan vaha mé á sahá ña naçaja ndó ta já ndaja cáhnu a ndohó jáchi naçandeeé ini ndó mé á.

⁸Quíhvi ini ndó Jesucristo ta cándeé ini ndó a vatí a ñáha cuni ndó a. Ña cán quéa ñacaan ndó cájii ini ndó ta ña yóho cúu á ña cáhnu ndivaha nu mé á. Ta ni co ñéhe ndó tuhun ndá quiahva ndicani ndó ña yóho nuú ñayivi. ⁹Cájii ini ndó jáchi cándaá ini ndó ña jácacu Ndióxi ndohó sahá ña cándeé ini ndó mé á.

¹⁰Anda sanahá ndivaha najáyaha na profeta tuhun ñacahan Ndióxi xihín ná nuú ñayivi. Ta cáchi na ña vaxi quivi caja cuahá Ndióxi ñamani xihín ñayivi ña jácacu a na nuú cuachi na. Ta vatí najácuaha na tuhun mé á joo coo ñacandaá ini na ndaja caja Ndióxi jácacu a ñayivi. ¹¹Ta ñúhu ínima yii Jesucristo ini ínima na profeta ta ñacaja mé á ña ná cahyí na nuú tutu ña ñacahan mé á xihín ná. Ta ñacahyí na ña vaxi quivi ndoho ndivaha ini Jesucristo joo tá nandihi já ndicáhnu ndivaha mé á. Ta nanducú na cán candaá ini na yo cacuu Jesucristo ta ndá tiempo cacu a. ¹²Ñacaja Ndióxi ña ná candaá ini na profeta ña a yáha yachi toho ña ñacahyí na nuú tutu jáchi cacuu a ña coo tiempo vaxi chí nuu. Jáchi sahá mé ndó ñacahyí na ña nuú tutu ta java ñayivi sa ñacaxi tuhun na mé tuhun vaha sahá Jesucristo nu ndo. Ta ñachindahá Ndióxi mé ínima yii mé á ña ná quixi a indivi ta ñachindeé a na ña ná cahan na tuhun vaha sahá Jesucristo nu ndó. Ta janda mé tátō Ndióxi cúni na candaá ini na ña yóho.

Ndítahan nu yo caja í tá quiahva cája Ndióxi

¹³Ña cán quéa caja tiaha ndó xíní túní ndo ña ná caja ndó ña cúni Ndióxi. Cahnú ndó xíní túní ndo ta coo tiaha ndó candati ndó ná jáxinu coo Ndióxi tuhun a ña caja cuaha mé á ñamani xihín ndo tá ná xinu quivi quixi tucu Jesucristo. ¹⁴A cacuu ndó ñayivi sáá ini jáchi cúu ndó jahyi Ndióxi. Co ndítahan ga cája ndó ña núu ña ñaxica ini ndó caja ndó tá cámaní candaá ini ndó tuhun Ndióxi. ¹⁵Ña ndítahan caja ndó quéa caja ndó ña cúni Ndióxi xihín ndinuhu ini ndó já ná cacuu ndó ñayivi yii. Jáchi Ndióxi, mé á ñacaxi ndohó cúu á ña yii. ¹⁶Jáchi já cáchi tuhun Ndióxi: “Ndítahan cacuu ndó ñayivi yii jáchi yehe cúu u Ndióxi yii.”

¹⁷Ta tá ná cachi ndó “tátá Ndióxi” já ndítahan caja cáhnu ndó a nani ndúu ndó ñuyívi yóho. Jáchi mé á cája vií a sahá ña cája in in ñayivi ta co sáhní toho a mé á ndá ñayivi cúu ná. In nuú cája mé á xihín ndihi na.

¹⁸Jáchi mé Ndióxi najáacu a ndohó nuú ndihi ña núu ñacaja ndó sanahá. Ta ña yóho cúu ña ñacatiaha ndó ñacaja tásáhnu jícó ndo. Ta sa cándaá vaha ini ndó ña coo ñachahvi Jesucristo sahá cuachi ndó jan xihín jiuhun cuáán á xihín jiuhun cúxú, ña ndihi sahá. ¹⁹Ña ñacaja mé á quéa ñachahvi a sahá cuachi ndó xihín nii mé á, dó yahvi ndivaha. Naxita do cán tá ñaxihi a ndica crúxu vatí coo ñacaja mé á cuachi. Najoco a mé á nu Ndióxi sahá cuachi tá quiahva ñacaja ñayivi tá najoco na in ndicachi vií nu

Ndióxi sanahá sahá cuachi na. ²⁰Tá cámaní cava sahá saha ñuyívi já nasacu ini Ndióxi quivi Jesucristo sahá cuachi ñayivi. Tá naxinu tiempo já naquixi a ñuyívi ña ná chindeé a ndohó. ²¹Xihín ña nacaja Jesucristo cándeé ini ndó Ndióxi viti, mé á najánditacu a Jesús ta nacaja cáhnu ndivaha Ndióxi Jesús. Sahá ña nacaja Ndióxi cándeé ini ndó mé á ta ndáti ndó xinu quivi quiahva mé á ña vaha, ña íin indiví nu ndó.

²²Ta viti nacasáhá ndo cája ndó ña ndaa já nandaja vií ndó ínima ndo ña ná quihvi ini ndó na cúu cuéntá Jesús. Sahá ña cán queá xíní núhú quihvi ini ndó na xihín ndinuhu ini ndó. ²³Cúu á tátuhun nacacu tucu ndó joo a juú ñayivi nacaja ña nacacu tucu ndó. Jáchi cúu á sahá ña cándeé ini ndó tuhun Ndióxi, ña co ndíhi saha anda ama cáa quivi. Sahá ña cán queá cúu á tátuhun nacacu tucu ndó nacaja tuhun Ndióxi. ²⁴Jáchi já cáchi tuhun Ndióxi:

Tóco ndihi ñayivi cúu ná tátuhun yucu cuí ña cáa yucu ña ndíhi yachi saha.

Ta tóco ndihi ña náhnu cája na cúu á tátuhun in ita cánuu nuú yucu cán.

Jáchi mé yucu cán ichi a ta ndicava ita nu á ta quiahva já ndíhi ri sahá ña cája na cán.

²⁵Joo tuhun Ndióxi, xitoho í a ndíhi sahá anda ama cáa quivi. Ta mé tuhun yóho cúu á ña sa nacaxi tuhun i xihín ndo. Ta cúu á tuhun vaha cáhan sahá Jesucristo.

2 Xíní núhú jándacoo ndó tóco ndihi ña núu cája ndó ta a jándahvi ga ndó ñayivi. Ndítahan cacuu ndó tá quiahva ndaa ndó ta a cáhíhvi ga ini ndó ta a cácuu ga ndó ñayivi ndahnda yúhu. ²Tá quiahva cája na valí ndúcú na chichí na quiahva já ndítahan ndinducú ndó candaa ini ndó tuhun Ndióxi já ná cuu cuahnu ndó xihín á ña ná jácacu Ndióxi ndohó. ³Tá ná caja ndó já jánaha ndó ña mé a ndaa táhyí nacandaa ini ndó ña vaha ndivaha ini Ndióxi, xitoho í.

Jesús cúu á tátuhun in yuu cáhnu ndácaan titó vehe

⁴Cayati ndó nuú Jesucristo, xitoho í jáchi tácu va mé á ta cúu á tátuhun yuu ndúhu ña nacandají da cavaha vehe. Joo nu Ndióxi cúu Jesucristo tátuhun in yuú vaha ndivaha ña nacaxi a. ⁵Ta caja Ndióxi xihín ndóhó ña ná cacuu ndó tátuhun yuu tácu ta cavaha Ndióxi veñuhu mé á xihín ndihi ndó. Ta sa cúu ndó jutú yíi nu á. Ta sahá ña nacaja Jesucristo xihín ndó cuu joco ndó mé ndó caja ndó ña cúni mé cuití va jáchi ña jan queá cájii ini Ndióxi xihín. ⁶Sahá ña cán queá cáchi tuhun Ndióxi tá cáhan sahá Jesús já cáchi a já:

Yehe nasacu u in a ñuu Sión ta cúu á tátuhun in yuu ndúhu ta mé yuu yóho cúu á ña nacaxi mí i ta cúu á ña yahvi ndivaha.

Ta ndá na ná candeé ini mé á a cándoo núu toho na caja i, cáchí tũhun Ndióxi.

⁷Mé yuu cáhan Ndióxi saha yóho cúú á Jesucristo ta ndíyahvi ndivaha nu mé ndó jáchi candeé ini ndó a. Joo na co candeé ini Jesús na cán cúú na jáxinu nuú tũhun Ndióxi tá nacachi a já:

Mé yuu ndúhu, ña nacandají da cávaha vehe, nanduu a yuu ña íin chága saha.

⁸Ta íin inga tucu nu cáchí a sahá Jesús:

Cúú á tátũhun in yuu cáhnu nuú cachihin saha ná ta jándicava a na, cáchí tũhun Ndióxi.

Ta mé na cán cáchihin saha ná jáchi co cúni na cuni johu na tũhun vaha cáhan saha Jesucristo. Ta janda saha nasacu ini Ndióxi ndoho na.

Ñayivi, na cúú cuéntá mé á

⁹Joo mé ndó cúú ndó na nacaxi Ndióxi ña ná nduu ndó na vehe mé á. Ta nanduu ndó jutũ cuéntá mé á ta mé á cúú á rey. Ta cúú ndó in táhndá cáhnu ñayivi yii ndácaan ndó in ñuu ña nandiquehe Ndióxi cacomí a cuéntá saha. Ta nacaxi Ndióxi ndóhó ña ná cáhan ndó xihín ñayivi ndaja ndáa ña náhnu cája Ndióxi. Mé a nacana ndóhó tá nasanduu ndó nuú naá cán já ná quixi ndó nuú ndató ndivaha yéhe nu íin a. ¹⁰Coó nasacuu toho ndó ñayivi cuéntá Ndióxi jihna joo viti cúú ndó cuéntá mé á. Coó natahvi ini Ndióxi saha ndó jihna joo viti táhvi ini a saha ndo.

Xíní ñúhú caja í ña cúni Ndióxi

¹¹Candehé ndo, ñani i. Xíca tahví i nu ndó, na cúú tátũhun na ndúu ñuu tóho jáchi indiví cúú ñuu ndó. Saha ña quíhvi ini i ndóhó saha ña cán quéa xíca i ñamaní nu ndo ña ná a cája ndó ña xíca ini yiquí cuñu ndó caja. Jáchi cúú á tátũhun cani táhan yiquí cuñu ndó xihin ínima ndo. ¹²Mé ndó ndúu ndó tañu ñayivi ñuyíví, na co xíca íchi cuéntá Ndióxi. Xíní ñúhú caja vaha ndó já ná cuni na jan ndá quiahva cája ndó. Vatí viti cáhan núu na saha ndo ta cáchí na ña cúú ndó na quini joo tá ná cuni na ña vaha cája ndó já quéa caja cáhnu na Ndióxi tá ná xinu quívi caja víi mé á saha tóco ndihi ñayivi.

¹³Saha ña cája cáhnu ndó Jesucristo, xitoho í xíní ñúhú coo johu ndó nu sáhndá na jutixia ndúu ñuyíví yóho nu ndo. Coo johu ndó nu cáhan presidente, da ndójo chuun cáhnu chága. ¹⁴Ta coo johu ndó nu sáhndá da cúú gobernador jáchi mé presidente cúú da sáhndá chuun nuú gobernador ña ná caja víi da saha na co cája vaha. Ta ndítahan nu dá cáhan vaha da saha na cája vaha. ¹⁵Cúni Ndióxi ña ná caja vaha ndó. Já quéa na tóntó jini, na co xíca íchi cuéntá Ndióxi cuni na ña vaha cája ndó já ná a ñéhe íni na cáhan núu na saha ndo.

¹⁶Vatí najani ndó ndáha ley Moisés ña nasacomí cuéntá saha ndó jihna joo cō cūni cachi a ña núná nu ndó caja ndó ndá cuachi cūni ndo. Jáchí xíní ñúhú ndicuhun ini ndó ña cúu ndó na cája chúun cuéntá Ndióxi viti.

¹⁷Xíní ñúhú coo toni ñúhú ndo xihín tóco ndihi ñayivi. Ta ndítahan quihvi ini ndó na cúu cuéntá Jesús. Ta ndítahan nu ndó caja cáhnu ndó Ndióxi. Ta ndítahan coo toni ñúhú ndó xihín da cómi chuun ñuyívi yóho.

Coó nacañan núu Jesús xihín na nacaja xíxi xihín á ta quiahva já nditahan caja ri mé ví

¹⁸Ndóhó, na cómi xitoho cuéntá saha xíní ñúhú caja ndó xihín ndinuhu ini ndó ña sáhdá xitoho ndó nu ndo. Ta a ndíñehe yúhu ndó nu ná. Coó a caja toho a á cúu ná ñayivi xíxi ini xihín ndo á cúu ná na quíhvi ini ndohó, na cō jándoho nahá ini ndó. ¹⁹Sa xíní ndó ña cūni Ndióxi caja ndó. Sahá ña cán quéa caja ndeé ini ndó tá cája xíxi na xihín ndó saha in ñaha coó nacaja ndó. Jáchí saha ña yóho cajii ini Ndióxi xihín ndó. ²⁰Vatí cája ndeé ini ndó tá ndóho ini ndó saha cuachi nacaja ndó, cō ñehe táhvi toho ndó ñamaní nu Ndióxi. Joo tá cája ndeé ini ndó tá ndóho ini ndó saha ña vaha cája ndó já quéa cajii ini Ndióxi xihín ndo. ²¹Jáchí saha ña yóho nacana mé á ndohó. Ta najánaha Jesucristo ña yóho nu ndo tá nandoho ini mé á saha ndo vatí coó nacaja mé á cuachi. Ta ña yóho cúu in quiahva nasacu a caja ndó. ²²Ni in túhún toho tañu coó nacaja mé á cuachi ta ni in túhún tañu coó najándahvi a ñayivi. ²³Tá nacasáha na cáñahá quini na xihín á coó nanducú ñehe mé á túhun quini nu na. Ta tá najándoho na ini a coó nasacu ini a caja núu a xihín na cán. Ña nacaja mé á quéa nasacu ndihi a ña ndáha Ndióxi, mé a cája vií ndaa saha tóco ndihi ñaha. ²⁴Mé Jesucristo nandicojo a cuachí jatá yiquí cuñu a cuahan tá naxihí a ndica crúxu. Ta cúu á tátuhun naxihí yó nuú cuachí ña ná cuu catacú cuéntá mé á tá ná caja í ña vaha cuití va. Najándicuehe na Jesucristo ña ná cuu ndivaha mé ndó. ²⁵Jáchí mé ndó naxica nuu ndó ñuyívi yóho tá quiahva xíca nuu in ndicachi, rí nandiñúhú nuú xitoho. Joo viti nandicó coo ndó nu Jesucristo ta mé a cán ndáá a ndohó tá quiahva ndáá in dataa ndicachi jana dá. Ta cō jándacoo ndáha mé á ndohó.

Ña ndítahan caja na sa natandaha

3 Candehé ndó, najihí, na ndúu yíi. Xíní ñúhú caja ndó ña sáhdá yíi ndó nu ndo. Já quéa tá cō cándúsa da túhun Ndióxi cuu xinu ini da candúsa da ña saha ña cája ndó ta a juú ga saha ña cáhan ndó xihín dá. ²Jáchí tá ná cuni yíi ndó ña cája vaha ndó ta cáhan toni ñúhú ndó xihín dá já quéa cuu jáxinu ndó ini da xihín ña cája ndó. ³A ndíhi nahá ini ndó caja cutú ndó mé ndó xihín ñaha ña cuu canaha lándá ndó xihín, tátuhun ña

chuhun lándā ndó yútu jini ndo á tátuhun ña cañuhu lándā jíqui jico ndo. Ta a ndíhi ini ndó cañuhu lándā jéhe ndáha ndo. Ta a ndíhi ini ndó candixi ndó jáhma lándā. A ndíhi ini ndó saha tóco ndihi ña yóho. ⁴Ña ndítahan ndihi ini ndó sahá cúu ña ndíyahvi nu Ndióxi. Ta ña yóho cúu in ínima ña nandicutú xihín ña vaha já ná coo vií ini ndó. Tóco ndihi ña yóho cúu ña co ndíhi saha. ⁵Jáchí quiahva já ñúchí ndivaha nasacaja najihí yíi, na nasacuu cuéntá Ndióxi sanahá. Nacandeeé ini na Ndióxi ta nacaja na chuun nasahnda yíi ná nu ná. ⁶Quiahva já ñúchí ndivaha nacaja ña nasananí Sara tá nacandúsa ña yíi ñá, da nasananí Abraham. Ta mé ñá cán nacachi ñá sahá Abraham ña cúu dá xitoho ñá. Ta viti mé ndó cúu ndó tátuhun jahyi mé Sara cán tá cája ndó ña vaha ta tá co yíhví ndo ni in ñaha.

⁷Ta jári ndóhó va dataa, da íin ñájíhí, a cája ndivaha ndó xihín ñájíhí ndo. Co toni ñúhú ndó xihín ña jáchí cúu ñá ña chíjín chága nu mé ndó. Ta ñamani, ña nasacu ini Ndióxi quiahva nu ndóhó, dataa, nasacu ini mé á quiahva ri a nuú ña cán va. Sahá ña cán queá ndítahan caja vaha ndó xihín ñájíhí ndo já ná cuni johó Ndióxi ña xíca tahví ndó nu á.

Ndóho ini java na sahá ña vaha cája na

⁸Candehé ndo. In ndítahan cacuu ndihi ndó. Co ndítahan cahnda táhan ndó. Ndítahan quihví ini táhan ndó tátuhun in cúu tátá ndihi ndó. Ta ndítahan candáhví ini ndó ñayivi. Ta coto a ndíñehe jícó ndo mé ndó. ⁹Tá ná caja núu ñayivi xihín ndo a ndícó coo ndó caja ndó já xihín ná. Ta ni tá ná canahá na xihín ndo a ndícó coo ndó canahá ndó xihín ná. Vaha chága ná caca tahví ndó nu Ndióxi ña ná caja vaha mé á xihín na cán. Ta nacana Ndióxi ndohó ñá ná caja mé á ñamani xihín ndo. ¹⁰Jáchí já cáchí tuhun Ndióxi já:

Ndá na cúni canduu nahá ñuyíví yóho ta co cúni na quixi tondóhó nu ná nani íin na yóho,
já queá ndítahan nu ná candaa na yúhu ná já ná a cáhan quini na.
Ta quiahva já ndítahan candaa na yúhu ná já ná a cáhan na ña tuhún.

¹¹Ndítahan caxoo na nu tóco ndihi ña núu ta caja na ña vaha cuití va. Ta ndítahan ndinducú na ña coo vaha ini na xihín ñayivi ta a jándacoo na caja na ña.

¹²Jáchí ndáá Ndióxi na cája ndaa,
ta táa johó a nu cáhan na tá xíca tahví na nu mé á.

Joo xójo ini a xihín ñayivi cája cuachi, já cáchí tuhun Ndióxi.

¹³Ni in ñayivi a cuú ndusa caja xíxi xihín ndó tá ná ndihi ini ndó caja ndó ña vaha. ¹⁴Joo tá cája xíxi na xihín ndó vatí cája ndó ña vaha, tahví nahá nacuu ndó. A cáyihví toho ndó ñayivi ta a ndícani toho ini ndó. ¹⁵Ña

ndítahan caja ndó quéa caja cáhnu ndó Jesucristo, xitoho í xihín ndinuhu ínima ndó. Ta xíní ñúhú coo tiahvá ndó nducú ñehe vií ndó tuhun nuú ñayivi, na cúní candaa ini sahá ña cándeé ini ndó Jesús. Ta ná coo toni ñúhú ndó xihín ná ta a ndíñehe jícó ndó mé ndó nani ndícani ndó tuhun Ndióxi nuú na cán. ¹⁶Ndítahan caja ndó ña vaha já ná a cácahan nuú ndó. Ta tá cáhan núu na saha ndó sahá ña cúu ndó cuéntá Jesús já quéa cacahan nuú mé na cán sahá tuhun núu cáhan na saha ndó. ¹⁷Ta tá mé Ndióxi quéa cúní ña ná ndoho ini ndó já quéa vaha chága ná ndoho ini ndó sahá ña vaha cája ndó a juú ga sahá ña núu.

¹⁸Ta in túhún tañu cuití va naxihí Jesucristo sahá cuachí. Ni in túhún toho cuachi coo nacaja mé á joo nandoho ini a sahá ñayivi quini já ná cuu ndihvi ndihí íchi cuéntá Ndióxi. Ta sahá ña nasacomí a in yiquí cuñu ñayivi naxihí a joo mé á cúu á ña naquixi indiví sahá ña cán quéa nanditacu tucu a ta tácu yíi va ínima mé á. ¹⁹Ta nasahan ínima mé á nu ndájí ínima ndii ta cán nacahan mé á tuhun Ndióxi xihín na. ²⁰Mé ínima ndii cán nasacuu na na coo naxeen cuni johó tuhun Ndióxi sanahá ndivaha. Tá nasatacu Noé já nasandatí Ndióxi ña ná cava ini na cán nani cávaha Noé mé barco cáhnu, dó jácacu ñahá. Joo chá cuití nasacuu na nacacu. Una víxí laá na nacacu nuú ticuúí cán. ²¹Ta viti tá cándúta yó xihín ticuúí já cacu ínima yó tá quiahva nacacu na cán ini barco sanahá. Tá cándúta yó xihín ticuúí co ndóo cuachí sahá ña nandoo yiquí cuñu í xihín ticuúí cán. Nacacú nuú cuachí jáchi cándeé iní Jesucristo ta cúní yó ña ná ndaja vií mé á ínima yó. Ta náha ña nacacú nuú indayá tá nanditacu tucu Jesucristo ²²ta sa nandaa mé á indiví ta íin a xoo cuáha Ndióxi. Ta sáhná mé á chuun nuú táto Ndióxi xihín nuú na cómí cuéntá sahá na ndúu indiví.

Náha Ndióxi nu yó ndá quiahva ndítahan nu yó caja chúun í ña ná ñehe táhvi yó nu mé á

4 Táquiahva nandoho yiquí cuñu Jesús quiahva já ndítahan canduu tiahvá ri ndóhó va ndoho ini ndó. Jáchi ndá na ndóho ini yiquí cuñu, na cán cúu na co cája cuachi ndaja nacuu. ²Ta viti co cája ga yiquí cuñu ndó ña núu cuéntá ñuyívi yóho. Ta níi tiempo ndúcú ndó caja ndó ña cúní Ndióxi. ³Jáchi sa nayaha ndivaha quiahva nacaja ndó ña núu jihna tá quiahva cája ñayivi, na co xíní Ndióxi. Mé tiempo tá cámani candaa ini ndó saha íchi cuéntá Jesús já nasacaja ndó tá nuú ña núu tátuhun ña xíca ini ndó caja ndó xihín yiquí cuñu ndó. Ta nasacuu ndó ñayivi xihí. Ta nacatóo ndó cája ndó vicó lándá ndivaha. Ta chí najáyaha quini ndivaha ndó ña nasaxihi ndó. Ta nacaja cáhnu ndó yoco ña nacachi Ndióxi co ndítahan caja cáhnu ndó. ⁴Ta nasahá cáhan núu ñayivi nasatáhan xihín ndó tá nasacaja ndó ña núu jihna. Jáchi viti co xíca nuu ga ndó cája ndó tá

nuú ña núu xihín ná. Ta viti sa ñacasáhá ndíhi ini na ndáti na ndicó coo ndó xihín ná. ⁵Joo vaxi quiví cūhun na cán cavií saha ná nu Ndióxi, mé a íin tiaha caja víi sahá na tácu xihín sahá na sa ñaxihí. ⁶Jáchí sa ñaxini johó va ñayivi, na sa ñaxihí cán tūhun vaha sahá Jesús tá ñasatacu na. Ñaxini johó na tūhun vaha sahá Jesús ña ná cuu catacu ínima ná tá quiahva tácu Ndióxi vatí ñacavií saha ná ñuyiví yóho tá quiahva cávií saha tóco ndíhi ñayivi.

⁷Jalóho cūni xinu coo quiví ndíhi saha tóco ndíhi ñaha. Saha ña cán quéa ndítahan nu ndo coo cáxi táhyí ini ndó ta xihín ndinuhu ini ndó ndítahan caca táhvi ndó nu Ndióxi. ⁸Ña cūni quéa ná quihvi ini táhan ndó jáchi tá quihvi ini táhan ndó já cája cáhnu ini saha táhan ndó tá ná yaha xihín táhan ndó. ⁹Ta a cójo ini ndó tá xinu coo ñani táhan ndó xito nihni na ndohó vehe ndó jáchi ndítahan ndiquehe vaha ndó na. ¹⁰Ñasahan Ndióxi nuú in in ndó ña ná ñehe táhvi ndó in in ñamani mé á. Ta ndítahan caja chúun ndó a ña ná chindeé ndó na cúu cuéntá Jesús. Ta ndítahan caja ndó ña tá quiahva sahan Ndióxi ndée ndó caja ndó ña. ¹¹Ta ndá tūhun ná cahan ndó xihín ñani táhan ndó, ná cacuu a tūhun yíi tátūhun ña cahan Ndióxi. Ta ndá ndó cája ñamani xihín inga na, ná caja ndó ña xihín ndée sahan Ndióxi nu ndo. Jáchi tóco ndíhi ña cája ndó ndítahan cacuu a ña cuu caja cáhnu í Ndióxi xihín. Ta cája Jesucristo ña ná cuu caja cáhnu í Ndióxi. Cáhnu ndivaha cúu a ta sáhdá a chuun nuú tóco ndíhi ñaha anda ama cáa quiví. Já ná coo.

Ndóho iní jáchi cándeé iní Jesús

¹²Candehé ndo, ñani i. Coto a catóntó nahá ndo tá quíxi tondóhó náhnu nu ndo. A cája ndó tátūhun na co xini quixi tondóhó nuu. ¹³Ña ndítahan caja ndó quéa cajii ini ndó jáchi xihín ña yóho cándaá ini ndó ndá quiahva nandoho ini Jesús. Ta xihín ña yóho cajii ndivaha ini ndó tá ná cuni ndó ndá quiahva cáhnu cúu mé á tá ná quixi tucu a. ¹⁴Tá cánahá ñayivi xihín ndo sahá ña cándeé ini ndó Jesucristo, táhvi ñacuu ndó. Jáchi sa ñandicutú ndaa ínima in in ndó xihín ínima yíi Ndióxi ta mé á cúu á ña cáhnu ndivaha. Mé ñayivi cán cahan núu na sahá joo mé ndó cája cáhnu ndó a. ¹⁵Tá ñacasáhá cája xíxi na xihín ndó co ndítahan cacuu a sahá ña cúu ndó taa sáhní ndii. Ta ni co ndítahan cacuu a sahá ña cája cuíhná ndo. Ta ni co ndítahan cacuu a sahá ña a váha toho ñacaja ndó. Ta ni co ndítahan cacuu a sahá ña ñaquihi nuu ndó nuú co ndítahan nu ndo. ¹⁶Joo tá ndóho ini ndó sahá ña cúu ndó cuéntá Jesucristo co ndítahan cácahan nuu ndo. Ña ndítahan caja ndó quéa caja cáhnu ndó Ndióxi jáchi ñañehe táhvi ndó cacuu ndó cuéntá Jesús.

¹⁷Viti sa naxinu coo tiempo casahá Ndióxi caja vií a sahá na cúu cuéntá mé á. Ta jihna mé yó, na cúu cuéntá mé á caja vií a saha. Ta a juú quiahva jándoho a ini java ga ñayivi, na co cuni coo johu nuú ña sáhdá mé á nu ná caja na. ¹⁸Jáchí cáchí tuhun Ndióxi ña janda mí, na cúu ñayivi ndaa nu Ndióxi ta ihví cáa saha yo jácacu Ndióxi mí. Ndaja ga ví caja Ndióxi xihín ñayivi sáá ini, na co cuni jándacoo cuachi. ¹⁹Sahá ña cán quéa tá ndóho ini ndó tá quiahva cuni Ndióxi, ndítahan nu ndó caja vaha ndó. Ta jári ndítahan nu ndó ndiquiahva ndó mé ndó ndáha Ndióxi, mé á nacavaha ndóhó. Ta cája mé Ndióxi ña sáhan tuhun a caja.

Ndicani Pedro nuú na cúu cuéntá Jesús ndíá ndítahan nu ná caja na

5 Ta viti cuni cahan loho i xihín na sacuahá nuú na cúu cuéntá Jesús ndúu tañu ndó jan jáchí da sacuahá cúu ri yehe va. Ta cúu u in da naxini xihín nuú i tá quiahva nandoho ini Jesucristo. Ta tá quiahva cuni na sacuahá ndaja cáhnu cacuu na nu Ndióxi tá cuhun na coo na xihín mé á quiahva já caja ri Ndióxi xihín yehe va tá ná xinu coo quivi nu ndíhí. ²Xíca tahví i nu ndó ña ná cacomí vaha ndó cuéntá sahá na cúu cuéntá Jesús. Caja ndó ña xihín ndinuhu ini ndó jáchí mé Ndióxi najándicoo a na ndáha ndó. Sahá ña cán quéa xíní ñúhú coo cuéntá vaha ndó xihín ná tá quiahva cuni Ndióxi. Ta coto a cája ndó ña xihín ña ndúsa. Ta ni a cája ndó ña sahá jiuhún. Ña ndítahan caja ndó quéa cajii ini ndó xihín chuun yóho. ³Ta co ndítahan cahvi ini ndó ña cúu ndó xitoho na cúu cuéntá Jesús jan jáchí na jan cúu ná na najándacoo Ndióxi nu ndó candaa ndó. Xíní ñúhú caja vaha ndó já ná cuni ri na jan va caja na ña. Jáchí na jan cúu ná tátuhun ndicachi ta ndóhó cúu ndó tátuhun da ndáá ñahá. ⁴Ña cán quéa tá ná quixi Jesucristo, mé á cúu da sacuahá nuú ndihi da ndáá na cúu cuéntá mé á anda já ndiquiahva mé á ña ndítahan ndiquehe ndó sahá chuun nacaja ndó yóho. Ta ña quiahva mé á nu ndó a cácuu toho a in ñaha ña ndihi saha.

⁵Ta viti cahan ri xihín ndóhó, da tacú. Xíní ñúhú coo johu ndó nu sáhdá na sacuahá nu ndó. Tóco ndihi ndó ndítahan candúsa táhan ndó ta co ndítahan nu ndó ndiñehe jícó ndó mé ndó jáchí já cáchí tuhun Ndióxi:

Xójo ini Ndióxi xihín na catóo ndiñehe jícó mé,

joo cája ñamani xihín na jánuu ndáha mé.

⁶Ña cán quéa ndítahan jánuu ndáha ndó mé ndó nu Ndióxi jáchí sa cándaa ini ndó ña cáhnu ndivaha cúu mé á. Vaxi quivi jándiñehe jícó mé á ndóhó sahá ña najánuu ndáha ndó mé ndó. ⁷Tá ndicani ndivaha ini ndó ndítahan caca tahví ndó nu Ndióxi ña ná chindee a ndóhó jáchí ñúhu ini a saha ndó.

⁸Cuéntá coo ndó ta coto a náá ini ndó jáchí tiñahá sacuahá cúu rí rí ihvi yo ta xíca nuu rí tañu mí yóho. Ta tá quiahva cája in león ndáhyi rí ndúcú rí yo caxí rí quiahva já cája tiñahá sacuahá yóho jándicava rí ñayivi nuú

cuachi. ⁹Xíní ñúhú coo ndacú ini ndó ta candeé ndusa ini ndó Ndióxi já cuu quee vaha ndó xihín ri. Ta ndítahan ndicuhun ini ndó ña tá quiahva ndóho ini ndó quiahva já ndóho ri java ga na cúu cuéntá Jesús ndúu ndijáá ñuyívi. ¹⁰Ta tá sa nayaha chá tiempo ndóho ini ndó anda jáví caja Ndióxi ña ná ndoo cuachi ndó ta jándihvi mé á ndée a ini ínima ndo. Níi tiempo cacuu ndó ñayivi ndacú ini xihín tuhun Ndióxi ta xihín ña yóho candeé ndusa ini ndó Ndióxi. Mé á cán cája cuahá ñamani xihín yo. Ta nacana mé á mí ña ná cohó coo í indivi ña ná ndaja cáhnu Ndióxi mí anda ama cáa quívi sahá ña in nanduú xihín Jesucristo. ¹¹Cáhnu ná cacuu mé á ta íin ndée a cája tóco ndihi ña cúní a anda ama cáa quívi. Já ná coo.

Ndínayí Pedro na cáhyí da carta nuu cán

¹²Chíndeé Silvano yehe cáhyí i carta yóho ta chindahá i ña nu ndo. Ta cája i cuéntá mé Silvano yóho cája chúun da cuéntá Ndióxi xihín ndinuhu ini da. Nacahyí i mé carta loho nu ndo jáchi cúní ndicani i ña ndaa nu ndó ña cája tá cája Ndióxi ñamani xihín ndo. Xíní ñúhú coo ndacú ini ndó ta a ndíndójó ndó tóco ndihi ña nacachi i xihín ndó yóho.

¹³Na cúu cuéntá Jesús ndúu ñuu Babilonia chindahá na Ndióxi coo ndó. Ta tá quiahva nandacaxi Ndióxi ndohó quiahva já nandacaxi ri á na cán va. Ta jári Marcos, da cúu tátuhun jahyi i chindahá da Ndióxi coo ndó.

¹⁴Cahan Ndióxi xihín táhan ndó ta tatí yúhu sajóho táhan ndó jáchi quiahva já ndítahan caja ndó sahá ña quíhvi ini táhan ndó.

Ta ña cúní quea ná coo vaha ini ndihi ndó, na cúu cuéntá Jesucristo. Já ná coo.